

Meeqqat atuarfianni atuartut akulliit ilinniarnissamut periarfissat assigiinngitsut qanoq atorneqarnissaannut atuartut ilisimasaasa annertusarnissaat siunertaralugu immikkut ittumik siunnersuinissat aallartinneqarnissaat aallartinniarlugit Naalakkersuisut peqquneqarnissaannik Inatsisartut aalajangiiffisassaattut siunnersuut. Suliniutissaq ukioq 2017-imi aallartinneqassaaq, paasisassarsiorlunilu angalanissanut, suliffeqarfinnut alakkarterinissanut suliffeqarfeqarfillu pillugu ilinniartitsinernut immikkut aaqqissukkanut aningaasanik kommuninit qinnuteqarfigineqarsinnaasunik pilersitsinissaq aaqqissorneqassalluni.

(Inatsisartunut Ilaasortaq Naaja H. Nathanielsen, Attaviitsoq)

Akissuteqaat

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisunut Ilaasortaq)

Siullermeerneqarnera

Inatsisartunut ilaasortap Naaja H. Nathanielsenip siunnersuutaa akissuteqarfigilersinnagu tamatigoornerusunik isummersoqqaassaanga. Meeqqatta atuarfiat annertuunik ajornartorsiuteqarpoq. Meeqqat atuarfiat inuiaqatigiinni nutartigaasuni atuartitsinerup pitsaassusaanut imarisaanullu piumasaqaatinut ilimagisanullu naapertuutinnigilluinnarpoq. Inuusuttut amerlasuut tamanna peqqutigalugu meeqqat atuarfiat pisinnaasat minnerunngitsumillu ilisimasassat piginaaneqarfiillu pisariallit, inuusuttut ilinniarsiini ilinniakkanilu inuussutissarsiuteqalissutaasinnaasuni aallartinnissamut piumasaqaataasut pigiliussimanagit naammassisarpaat.

Ukioq kingulleq upernaakkut, meeqqat atuarfiannik sumulluunniit attuumassuteqanngitsunit nalilersuisimanerup nalunaarusiarineqarnera saqqummerpoq – tassanilu atuarneqarsinnaasut nuannersuinnaangillat. Nalilersuinerup taassuma nanginnera tassalu Ilisimatusarfimmi ilinniartitsisunngorniartarnerup nalilersorneqarnera tamanut saqqummiunneqaqqammerpoq taassumalu erseqqissumik uparuarpa ilinniartitsisut ilinniarnarisa pitsaassusaat annertuunik ajornartorsiuteqarfiusoq – tamannalu soorunami meeqqatta meeqqat atuarfianni atuartinneqarnerinut sunnuteqanngitsoorunnangilaq.

Nalilersuinermit inernerit nikallornartut maanna taagorneqassanngillat – qularnanngitsorli tassaavoq akisussaassusilimmik suliassaqarfinni meeqqat atuarfiannut tunngasuni tamani piaarnerpaamik iliuuseqartoqartariaqarnera. Meeqqalli atuarfiata suliassaa pingaarneq tassaavoq atuartunik atuartitsineq. Tamanna pitsaanerpaaffissaminiinngippat ilimannarluninngarpoq, atuartut amerlasuut ilinniartitsissutini inuttullu pikkorissutsikkut piginnaasatigullu tamakkiisumik ilikkagaqarnissaraluinik – kingusinnerusukkut ilinniakkamik suliffigiligassaminnilluunniit toqqaanissaminni iluaqutissaminnik periarfissinneqanngitsoornerat. Meeqqat amerlasuut ullumikkut ilinniartitsissutini atuarfimmit sumiginnarneqartarput – aamma meeqqat inuusuttullu amerlasoorujussuit ilinniakkamut tigutinnissamut piukkunneqalerumallutik arlaleriarlutik qaffassaqqeqqaartariaqartarput.

Naalakkersuisut taamaattumik isumaqarput ilinniartitsisunut meeqqat atuarfiini sulisooreersunut sammisunik perorsaannikkut siunnerfilimmik piginnaanngorsasoqqaartariaqartoq ilutigitillugulu ilinniartitsisunngorniartarneq piaarnerpaamik ullutsinnut naleqquttumik pitsaassuseqalersinneqartariaqartoq – ilinniartitsisunngorlaat taamaalillutik meeqqat atuarfiini meeqqatsinnik isumannaatsumik atuartitsinissamut ilinniartitseriaatsinik aamma periutsinik

minnerunngitsumillu ilisimasanik pisarialinnik pigiliusereersimasassallutik. Tassunga peqatigitillugu nunatsinni meeqqat atuarfiini tamarluinnangajanni atuarfiit pisortaat pitsaassutsimik qaffassaanissanut pisarialinnut siulersortaasinnaangorlugit piginnaangorsartariaqarlunnarput.

Inatsisartunut ilaasortaq Naaja H. Nathanielsen siunnersuuteqarpoq meeqqat atuarfianni akullerni atuartunut immikkut ittumik siunnersuineramik, atuartut ilinniagaqarnissamut periarfissanik assigiinngitsunik sumullu atorneqarsinnaaneriniq ilisimasaqarnerulernissaannik siunertaqartumik suliniuteqartoqassasoq. Naalakkersuisut siunersuummi siunertarineqartut pingaarnerit isumaqatigisorujussuuvaa - meeqqallu atuarfianni paasisassarsiorluni angalanissamut periarfissanik, ilinniarnissamut suliffeqalernissamullu qaammaasaannik ilisimasanillu pitsaanerusunik pilersitsinissamut tunngavilersuutaasut paasilluarlugit, neriunarporlu atuartut taanna aqutigalugu ilinniagaqalernissamut kajuminnerulersinneqarsinnaasut.

Tassunga atatillugu Naalakkersuisut oqaluttuarisinnaavaat meeqqat atuarfianni atuartut paasisassarsiorlutik angalanissamut periarfissaasa pitsanngorsarneqarnissaat pillugu Air Greenlandimik suliffeqarfiup CSR-imik suliaqarneranut atatillugu oqaloqateqarnerit aallartinneqareersimasut. Oqaloqatigiinneq kommunit KANUKOKA-lu akulerutsillugit pivoq ilimasuutaavorlu suleqatigiinneq taanna atuaqatigiinnut nunap ilaanut paasisassarsiorlutik angalarusuttunut angalanissamut periarfissanik pitsaanerusunik pilersitsiqataasinnaajumaartoq. Taassuma saniatigut Naalakkersuisut kissaatigaat sussaartut inuussutissarsiutinillu ingerlatsisut allat qaninnerusumik oqaloqatiginissaat, tamannalu pissaaq qanoq iliornikkut pitsaanerpaamik atuarfiit, sumiiffinni assigiinngitsuni inuiaqatigiit avatangiisaasut minnerunngitsumillu suliffeqarfiit akornanni pitsaanerusumik suleqatigiittoqarsinnaanera tunaartaralugu – anguniarneqarporlu suliffeqarfiit namminersortut aamma pisortat suliffeqarfiutaat meeqqat atuarfiata atuartitsineranut suleqataanerunerisigut inuiaqatigiinnullu ataqatigiisitsinikkut pitsanngorsaaqataannissaat.

Naalakkersuisut ilisimavaat atuarfinni arlalinni atuartut ilinniagaqarinnissamut periarfissanik paasisimasaqarnerulernissaannik siunnersuisarnernik pitsanngorsaasoqartoq. Naalakkersuisullu suliap ingerlateqqinnerani atuarfinni ataasiakkaani suliniutit taakku pitsaasut tunngavigerusuppaat.

Soorlu oqaatigineqareersaq Naalakkersuisut siunnersuut taperserpaat maannakkuugallartorli periarfissat allat ammatikkusullugit aningaasaliissutissatullu siunnersuutigineqartumi periarfissanut killileerusunnatik. Naalakkersuisut aamma ilisimasalinnik minnerunngitsumillu kommuninik oqaloqatiginninnissamut piffissaqarusupput tapiisarnerup akulliit atuarfiannut sammitinneqarniarnerata pissusissamiisoortuunera pillugu. Tunngavilersuutigineqarsinnaavoq atuartut suliffeqarfinnut alakkarterisarnissaat imaluunniit paasisassarsiorlutik angalaartarnissaat inuussutissarsiummik aamma/ imaluunniit ilinniagarerusutamik toqqaanissamut angajullit atuarfianni pisassappat sunniuteqarnerusinnaassasoq. Naalakkersuisut taamaammat aamma nalilersorneqaaqqaat atuarnarup ingerlanerani killiffimmi sumi tapiissuteqartarnissaq pissusissamisoornerunersoq.

Taamaammat Naalakkersuisut imaattumik allannguutissatut siunnersuusiorsimapput neriullutik inatsisartut paasinnillutik siunnersuummik ilaliiumaartut:

”Atuartut ilinniarnissamut periarfissanik assigiinngitsunik taakkualu sumut atorneqarsinnaaneriniq ilisimasaqarnerulernissaat siunertaralugu atuartunut akullernut aamma /imaluunniit angajullernut siunnersuinikkut immikkut ittumik suliniuteqarnissamik Naalakkersuisut peqquneqarnissaannik Inatsisartut aalajangiiffigisassaattut siunnersuut. Naalakkersuisut kingusinnerpaamik UPA 2017-imi Inatsisartunut pilersaarummik saqqummiussissapput qanoq iliornikkut meeqqat atuarfianni atuartut paasisassarsiorlutik angalanissamut periarfissaat, suliffeqarfinnut alakkarterisarnissaat aamma suliffeqarneq pillugu immikkut aqqissuussamik atuartitsisarneq –suliffeqarfiit, angalatitseqatigiiffiit kommunillu suleqatigalugit pitsanngorsarneqarsinnaanersut.”

Naalackersuisut siunnersuuteqartoq qutsavigaat Inatsisartullu oqallilluarnissaannik kissaallugit.